

Teenstropery: 280 polisielede veg saam

Twee karkasse van renosters op plaas ontdek

Francoise Steynberg

Altesaam 280 polisielede van oraloor die land word in teenstropingseenhede op 'n driemaandelikse roteringsbasis in die Palmwagkonsessie en die Etosha en Bwabwata Nasionale Parke ontplooi.

Só het die polisiehoof, Lt.genl. Sebastian Ndeitunga, verlede week by 'n slypskool vir wildmisdaadwetgewing aan ondersoekbeamtes en aanklaars in die hoofstad gesê.

"Die doel hiervan is om die teenstropingseenheid en patrollies van natuurbewaarders van die ministerie van die omgewing en toerisme te versterk," het Ndeitunga gesê.

Hy het gesê voortdurende renoster- en olifantstropery en die onwettige handel in horings en ivoor in Namibië noop die polisie om nou saam met die ministerie te werk, veral betreffende wetgewing wat spesiaal beskermde wild moet bewaar.

"Die Namibiese polisie is toegewy aan samewerking in die stryd teen wildmisdaad. Die samespanning van Nampol, die ministerie van die omgewing en toerisme en die Blue Rhino-taakspan is aanduidend van die uitdagings van stropery," het die polisiehoof gesê.

Hy het gesê hoewel borgtog enige beskuldigde se grondwetlike reg is, "is dit ons plig om alle wetlike maatreëls in ag te neem om te verseker dit is in die belang van die publiek, daar word nie met getuies of die polisieondersoek ingemeng nie en feitelike bewyse word aan die hof voorgelê om dit te ondersteun".

Intussen is twee renosters verlede week op 'n private plaas in die Dordabis-distrik gestroop en hul horings verwyder.

Volgens die misdaadverslag is die karkasse verlede Donderdag deur die plaaseienaar ontdek.

Niemand is tot dusver in hegtenis geneem nie en die polisieondersoek duur voort.

## 13 VERDAGTES VAS

Van 9 tot 15 September is altesaam 13 verdagtes in verband met wildmisdaad in hegtenis geneem.

Vyf uit die 13 verdagtes is vas in verband met renosterstropery of die handel in horings, en een oor olifantstropery of ivoorhandel.

Volgens Nampol se eenheid vir beskermde hulpbronne (PRU) en die ministerie se intelligensie- en ondersoekeenheid se weeklike wildmisdaadstatistieke is sewe nuwe sake verlede week aanhangig gemaak.

Beslag is op twee renosterhorings, twee olifantande, twee lewende ietermagôs, twee ietermagôvelle, twee leeuvelle en vuurwapens gelê, en sewe patronen is gekonfiskeer.

Tien van die verdagtes is Namibiese mans en drie is Zambiërs. Die Zambiese burger mnr. Kopela Simata is verlede Woensdag glo in besit van twee olifantande op Katima Mulilo in hegtenis geneem en mnre. Fula Pumulo en Siyayo Kinamo is op dieselfde dag en dorp glo met een lewende ietermagô vasgetrek.

## HOFVERSKYNINGS

Verskeie Namibiese beskuldigdes het verlede week in howe landswyd vir wildmisdaad verskyn.

Mnre. Uatenguainja Ngumbi, Vetumunaije Pekaha, Zakonekwa Ndiaoambe en Raimo Kakongo is verlede Maandag in die landdroshof op Oshivelo op borgtog van N\$8 000 vrygelaat ná hulle op klage van die onwettige besit van vuurwapens en ammunisie verskyn het.



(<https://d3rp5jatom3eyn.cloudfront.net/assets/images/280-polisielede-veg-saam2019-09-180.jpg>)

20/09/2019 Mnre. Daniel Shilongo, Efraim Ashimbanga en Valentine Kanyata het vandaag Midland Landdroshof Otavi in verband met die stroop van 'n renosterkalf verskyn. Al drie beskuldigdes bly in aanhouding.

Mnre. Hamutenya Penty, Petrus Kanyata en Andreas Gabriel het verlede Vrydag in die Windhoekse landdroshof in Katutura in verband met die besit van 'n lewende ietermagô verskyn en is op borgtog van N\$2 500 elk vrygelaat.

Mnr. Hendrik Dumeni het op dieselfde datum en hof in verband met die besit van twee ietermagôvelle verskyn.